


JATTANGKO RIPINGKUNA

((Poedorang))



By
Nightjar R. Marak
Malchapara Village,
West Khasi Hills, Meghalaya.

JATTANGKO RIPINGKUNA

(Poedorang)




By
Nightjar R. Marak



Malchapara Village,
West Khasi Hills.
Meghalaya

Published by
Nightjar R. Marak



Malchapara Village,
P.O. Hahimbazar,
West Khasi Hills

AGANCHENGANI

Ia chongipa kittap, ‘Jatangko Rippingkuna’, angni skanggipa kittap ong·a. Ian chimonggimin poedorangsan ong·a. Sea·jotani bidingo ian angni skanggipa tikkalani ong·ani gimin kittapni bimungna kra kra seanide ong·skajaha ine anga an·tangan uia; maina ning·tua kattarangko bikotna aro poedoo jakkalna kragipa aro knatogipa kattarangko cho·bile am·pana gisik a·ning bitpajani gimin chanchia mingsako, sea ming·gipinko dake segolgole poedo ong·atdraani gitanan ong·aia.

Ia kittapko chapa ka·atna gita tangka·paisarangchi dak·chakanina anga Meghalaya Sorkariko, chong·motan, Arts and Culture Departmentko dingtangmancha mitelna kusi ong·a; maina, chonbegipa kittapsan ong·oba ia chimonggimin poedorangko kittapni bimangona ra·bana ang gita pante mandena mamung ka·dongani dongjachim.

Seanirangko namdapatna aro sronggijanirangko srongatna, saoba angna ku·pattianirangko ba dakchakanirangko on·paode, mitelbean baksa anga uarangko ra·chakna kusi ong·begenchim.

Mitela.

Dated : 27th July, 2011.

Nightjar R. Marak



AGANDAPANI

‘Jatangko Ripingkuna’, ian baditaba ming poedorangko kadimgimin chongipa kittap ong·a. Kittapni bimungko nie, iako seani miksonganiana, jatangni ku·sik, niam·riti, aro dakbewalrangko ripingna didiani, ding·doatani ba gisik ra·atani ong·a·chim ine nikna man·gen. Indiba, author uni aganchenganio janapaha gita, sea·jotanio ian uni skanggipa tikkalani ong·anigimin kittapni bimungna kra kra miksonga mingsano seanide ong·jaha. Jatni niam·riti, dakbewal aro ku·sikko ripingna didiani aro gisik ra·atani poedorangde baditaba mingsan dongaiaha.

Chapa ka·atna skang an·tangni seanirangko namdapatna gita author angna chu·gimik bilko on·ahaoba somoirang dongja baksana, uni segimin poedorangni miksonganirangko bang·batakon ma·sisokjahani gimin anga punctuationko correct ka·ana agre mingsakoba on·dape aro den·gale namdapaniko dakna kusi ong·jaha.

Unigimin, authorni pal ong·e anga mingsakosa aganna sikgenchim·ia kittapko, mongsongbate poedorangko namdapatna, jakkaltogipa aro kra·ma·gapgipa kattarangko on·e aro gualanirangko mesoke saoba dakchakpa·ode anga kusi ong·be·genchim aro dingtangmancha uko mitelbegenchim.

Mitela.

Stowman J. Sangma

JATTANGKO RIPINGKUNA

CONTENTS

	Jak
1. Achiknan krachongmot ...	1
2. Rakari ...	1 - 2
3. Kuran srie, jaknan mitchia ...	3
4. O Dobima! ...	4
5. Niroke kam kabo ...	4 - 5
6. Gitel somoi onenga ...	6 - 7
7. Ongataha! ...	7 - 8
8. Sinkarina gogata ...	8 - 9
9. Achik ...	9 - 10
10. Silbejok mechik ...	10 - 11
11. Sanditaikubo ...	11 - 12
12. Kakket mechik ...	12 - 13
13. Wachi rachaka ...	13 - 14
14. Gando Makkal ...	14 - 15
15. Angni Ambi ...	16
16. O Ang atchiram ...	17 - 18
17. Duk! ...	18 - 19
18. Aman' Aking ...	19 - 20

1. A-CHIKNAN KRACHONG-MOT

Kangsarikon te·rakrak olbaa,
Ramatangko choknoke re·baa,
Ja·ku ga·an kratcha kratchasa,
Ku·ba watan ka·sri ka·srisa.
Wagam kitma, sona bitchri,
Ku·rang ranggisilchi agangrikjok,
Balsal ganti gita knasringjok,
Nio nikinap agangriko krat krat,
Dal·a dakja golpoo gisik do·sikdikgipa.
Pakkre gitote bilbanga suaka,
Mingnan kraa na·asa Achik,
Ganding chinding jatkon dine jetjok,
Nigipana nikinap janggil mikkang ninijo,
Mingsingatna jatni, duru bolna na·an krajok.



2. RAKARI

Gamkario gamaha duk chake,
Mika bitchi ringe ja·sil a·mang nape,
Bikma okkrie gitok chi ringna skoba,
Be·en sal kame kni nanggreng kon·eba.

Brak, gitotan salo katchi nangtingoba ja·o,
Nokmaniko ra·samsoe, bikmana godomaka,
Indioba da·o cha·a misi danga saljong umango,
On·pilskana groko sokjok somoi uamangna.

Duk chakgipana dukni kri man·ani,
Dapak wilwilate wal·ku tongmikgen,
Duk chakgijana aratani kri bebuari,
Jakari jakchom kokari koksronggen.

Wa·se besa kae, mikgil janggop pingiparang,
Niwakari dongaignok, jawani dapakana da·ode uamang,
Sikpaoba dapak wilwilaltna, bimchipan' griode,
Bimungnasan gamaiode ong·aigen beburara uade.

Wal·du ra·e walchakgipana kingking sale cha·bakgipana,
Mi bijime katnapa bakkandie bak man·paa,
Re·a ramatango danga a·baku nikrie,
Re·o ja·ku tang·a, gamo a·ba nika uni.

Pringo mitmat attamo, chitchat guri dinoba,
Kamtangko bon·atna, a·palchi ong·katangjok rataina.
Pakkre gitote mi jamo suakatjok an·tangna
Daksamsojok wachini somoio mikna uripjana gita.



3. KUNAN SRIE JAKNAN MITCHIA

Nina ino misilgni, aganna ino donmitapani,
Rongsa chi-on do-bima, saksa ba-on me-chikma.
Sokme a-jak bote ja-ping de-na sika,
Parakjawa me-chikma, sokko dine de bi-sa gipake.

Ong-katanga nokonide, bi-sako chakkolo done,
Rama re-na ki-sang nongneng ja-ku ga-e.
Sal namchiktang gitan, mikkang bimang sa-metra gitan,
Ma-sijawa changsa nikari bi-sa donga gitan.

Re-angpiljokode setang nokkolna gipin biapchi,
Sokme a-pal wate, ja-ping meram ramangjok.
Seng-ki tettaie, gana engtaijok da-obatai,
Segipani re-bajana kingking ake cha-taijok jawaming seke
dongtaijok.

A-gilsako andalsikmiting, achak matcha chikmiting!
Sing-kam gae do-ga oe, dilatbajok me-asa unomiting,
Nokgil gae, sing-kam teke re-bajok seng-pilosa,
Setanga kamtangchisa, paksade gitchak paksade
gisimosaha.



4. O D·OBIMA!

Pring attam chotchangja, do·bimani rorota,
Bi·sadrangko watbrake bachi re·a indita?
Gingmattangan chingde an·piljok,
Ja·si biman gonggengangpiljok.

Knaaton gisikako, do·bipani ku·rangko,
Noksam okgil bon·changja, nang·ni rorotako.
Ki·sang balwa ringchakpilesa,
Mikkang do·bipako nichaksoesa.

Bi·satangkon ma·watgijan, sa·metra rotiaie,
Ong·katangjok da·obatai, grang dokponge.
Janggilate katmana, nokgipade nang' bewalna,
Mikkimite chakmana, nina amjae an·tang mikgronna.

Ja·o ro·ong kante kaomangba,
Oko tal·ak keomangba,
Gitokmao majoangtaijok,
Srebako dolbale katangtaijok.



5. NIROKE KAM KA·BO

Matnangako man·jana, ka·bo knaa bimchipe,
Game sue chaoba, agal so·ariode,
Ko·e ringna inoba, chian a·dubekkarijok,
Gipinni cho·choako cha·ode okana man·jajok.


Gama gri jamo mi gapatode,
Ku·monga gri kam bimchipode,
Grongtangan nanggen, jachingtangan bu·gen,
Ja·manode jakari jakchome kokari koksronggen.

Jakchi jakjipako gale, mikchi mikkemako wate,
Alabok gita sutetgija, amak gita rengkokgija,
Onggaltango chatingjana, krongtango chagakjana,
E·sal bitolko chitchengbo, am·bol ja·bakko gatbo.

Do·kimil paa gita, grang sepa gita,
Do·reng agampa maldapoba, gu·ang nengra chae chikoba,
Do·ma meraako watode, rengsi sikako okode,
A·chik jatni mikkimde niksengjawa nang·kode.

Engatangkon bon·gija, palgipinko engdape,
Sakgipinni dama dokana chrok mesae,
Huruan mikoja , amakan re·bajajok,
Ja·mande jaksil dokgoke kotip po·okjok.

Rasong, rasong agangen a·bachengode,
Kabe a·kol tu·anga gita me·a rimbanga gita,
Jong·a ki·siko ang·ke kol mittipe,
Ja·mande kaksi su·pekjok pekma sin·jete.



6. GITEL SOMOI ON·ENGA

O mande nang·ni damben' sal somoimiting,
Bika a·dram be·jana, mikchi chiwaringjana,
Dim·ak nanggimin, anggal ba·giminko talatbo;
Taribo ka·tongni bilrangko Gitelna gital gisikko.

Sian' a·kongko re·o, ong·genoba na·a pap wario,
Dukni jagringrang, nang·ko simdapo,
Sal somoi dingtangjok, gital chasong ong·jok,
Nipilate kamko ka·na, na·a da·on nanggnok.

So·sojengjeng samtangtangchin knatokengjok,
Biltangtangna sekseke dakgriktokengjok,
Kenchipchipe janggi tangna, nanganin gapaha:
Sason gri mitam brangangtokaha.

Kaksi su·pekjana, pekma sin·jetdapjana,
Kaja nie jasku tem·e, Isolo bi·ritingbo,
An·tang dosiko jong·a ki·sikjana, ang·ke kolmitdapnabe,
Gisik gital atchie, Isolna ronggrip maribo.

Adamomin sia napaha, an·ching mandeo,
Dim·pengaha papni do·gachi sakprakprakon.
Maikai na·a jokna man·gen iako chatchibo,
Re·baenba Jisuna sichakaha, chis·yo an·ching na.

Sal somoi manchinabe, on·enga da·on Gitelde somoi,
Gisik do·mesale, mikgronko mikasale katnapo Jisuchi,
Do·ma merac angsi marie gitokmako majoe galbo
Achak wa·tok krujana, sal man·on namako dakbo.



7. ONG·ATAHA

Angsi marie kam ka·china Isol an·tangna
Nachil mikgronko ong·ataha knatime nichina
Kuchil gingtingko ong·atjok rang·site ku·agana,
Indioba mesokjawama na·a chin a·sakni mandena?

O ja·a·jak! bimchipjawama na·a Isolni a·bana?
O nachil! knajama na·a nagok changesa?
O mikron! nikjama niatpana Isolni a·bachiko?
O ku·chil! ku·ma changama, aganprakna Isolni kattako.

Mingsa kamko Isolna chin mesokjokon,
An·senga gisik bimchipoa Isolni daggiminrang.
Dongnabe boda dake, O gisik seng·giparang,
Mesokatbo chinko agilsakona nang' atchie revbaaniko.

Indinde dakramaijawachim O Apa na·a?
Ong·atjokchim maibako niksamsae an·tangna kam ka·china.
Indioba a·gilsakni manderangbano tusienga?
Jong·mot puna, kinma rokna, on·ama an·tangko?

Chonchongipa sumal aro jo·ongan bimchipode,
Do·burungan knatoa gitko ringringe ka·srokatode,
Kusiniko on·e uarangan dakgipako mitelengode,
Mande ong·e, gisik bambame ring·ringna changjama na·ade?

Balenggipabibalnan Isol ka·saode,
Bilenggipa do·drangna uan alduengode,
Mande ong·e gamchatachim, urangna na·ade,
Gisik do·mesale, nachil knaate, ka·bo da·on a·sako bimchipe.



8. SIN·KARINA GOGATA

A·kaweon rona an·sengtabaijok,
A·pal mirang simdike oknangbajok.
Dimbil bipang rimate bijimbataiaha,
Gamgiparang ge·atangko biteatna chiru a·gataha.

A·bani akaru, gominda minbaaha.
Matrurungrang cha·na a·sesamo malubaaha.
Narang komilarang minbana gitchakbaaha.
A·paloni chirang tipchange ran·krekaha.

Chibimani rikramrango grit kasi chabajok;
Nitoriri an·chengo jong·dol nok riktaignok,
Angkil bibalrangko bijarang dimtaijok,
Chikong, wari aro chicholrangba rekangjok

Bolsal sodako do·tileng korkor doktaignok.
Guepango do·bretrang biapna seksejok.
A·sarini etchalukrang a·miteko nape chaktaijok,
Ang·ke a·kol ning·tue bitbana a·bachengjok.

Ru·at nade gane, mika bitchi ringe bimchipgiparang,
Ge·atangni bitena nisengsoc a·na kangkarekagiparang,
Okipu rama re·a gita, ge·giminko bimaatna rikginok,
Jiksisa kni so·rime gandil ga·tetrimgnok.



9. A·CHIK

A·chik inon intoa, nina nion nitoa;
Chisam do·kime gita, a·ning rongsore gita.

De·e me·sokatpabo, sale pinikatpabo;
Nike katchapachina, jawan jatrangnangkoba.

Sing·atode agangema? Talate na·a an·tangko,
A·chi bamchikopgija, jaksi su·chokchokgija.

Mingbaenga chasongni chasong, jechakjawa jatni rasong',
A·ba rama rongsata, chikorama chinanga.

Mitelna kraoba nang' mikkang chijimana,
Ong·atbo na·a jatko de·dona,
Bolgong matgitchak gita, gisik do·mesal gita

Toatode sokgenma saoba? Nang' nitoan gunkosa,
Janggilchiba ninijok, kni kasot dimrimjok.

Nang' mikkang salgra chong·motanan,
Bimang moepa chong·motan,
Miknianan mikchaa, agananan ka·sara.

Mikkangnia chijimanan, kni kasot dimrimanan,
Mikron nian dintangjok, ja·ku ga·an de·jajok.



10. SILBEJOK ME·CHIK!

Silbejok me·chik na·a bachinasa,
Nikgrikaijok nang·ko cinema actress gitasa.
Mikkang nian chimujimjim,
Kni kasot dimrimrim.

Nichakoba amrikjajok nang' bimangko,
Saljatchin' sal gita teng·brapangpilako.
Kranikama na·a indaka gandingko.
Ok nae gandil nike nongnenge re·ako

Nisona pa·jaenba da·nang mamatangde,
Dongnuengjok on·tisamang mitinako am·e
Kni mojimpil·esa ki·sang nangnengpilesa,
Re·pakanga an·tangde nikja dakesa.

Ma·sijama na·ade dakmandan` gamchatako,
Mainasa ja·rika jawan` ganding chindingko.
Gilja·adi re·a maia mingjajokma na·a?
Kranikbatama an·giltangko mesokna re·na?

Chanchia gisiktango, na·a an·tango,
Indaka kamrangchisa man·gen pante silako.
Bebe gita pante silako na·a man·genoba,
Sokjawa gisikde makkre mikkangkoba.

Silbeoba nang` bimang, jawa gipin gita.
Bigil an·gild ikchari ra·daldal gita.
Bimang an·gil mangmangkosan silataigija,
Tikkelbo nitoatna nang` bewalkoba.




11. SANDITAIKUBO

De·o salna soka, pino a·na gipa,
Dapak wilwilate pilakchin wal·ku tongmikata,
Bimang dorimit gitanragong bol bijak gitan,
Silde silbebeachimkamcholon simchi soa.

Chanchia nabajok ang` gisiko bigil bikgil.
Do·do gitan bidaling, rua gitan penaring nitoa nomil.
Do·bok paga kanagachim, achak wa·tok krugnokchim,
Agar·ku·basale naljokatjok ang`ripengtan.

Gisiktango bambaria nabajok nitogipa nomilde,
Kam cholon namrongjama, deo salna sokgipade?
Ki-sang balwa ringchakesa, mikkang mande nichakama?
Ja-ping de-na sikesa, sokme a-jak botama?

Nikrongaba bangbatakon, silana mikboke ra-gipako,
Meli nangrimgija, nokdang hai kajia nangako.
Jikgipakon ge-etna amgija, babilisio inan indoako,
Segipakok ning-o done, jiktang sasason mariako.



12. ANG' ATCHU AGANA

Silsilgipa, nitogipa nomilkok agana ang' atchu,
Silakode cha-jawa uade do-nok wagam gri mechik gisik gri,
Indioba gun gnanggipa me-chikosa, etalaba bebe ine agana,
Dama bangsi sike jakpa doke okamatna angba ua nomilko
sandie.

Gipinni cho-choako chaode okanan man-ja,
Jawani meseng chaana ku-chi mitapna nangja,
Grongao chadikatgija ga-akatjana mangsako,
An-tangna Isolni namnikako sandie jora ra-c adil mitugrikbo.

Ja-ping ringchi gita naate ganggipade,
Imbanggiko sike gongbimako dokgipade,
Ja-chingtangan mata, gangchingtangan bu-a,
Jak jakripgija, mikchi mikkemgija, watbo mosa ua nomilko.

Kaan gudu chabagen, chume ragu pekgen na·a ja·mande,
Jangwa ki·siko jumang matpu puchengbo na·ade,
Kakse su·pekjana, pakma sin·jetjana an·tangko ninibo
Me·chikara uasan ong·ja gipinko sandibo.

Ja·man ja·wil agan-mitakjana, name nibo ja·gitotgen,
Knitoman chingdea, ja·si bimaan gonggea,
Tangka-sona jakchom dikrimitanan mikboknabe,
Gisik do·mesale kusi ku·patie ra·chengbo an·tangko agane.



13. WACHI RA·CHAKA

Wachikari sokbaengjok,
Chiring chibisikoni dal·bana a·bachengjok,
A·palrango bengbongrang, hongoe mikobajok,
Burungni sambolrang, bijak gital nakatbajok.

Do·burungrang bolkolo, bitip ra·e bi·sa ba·gnok,
A·kaweni manderang, bikmatangna a·pal gamgnok.
Te·brong te·gatchu bite minsrue rurongbaaha,
Burungni wa·kantarang, chi nape spongaha.

Ramarango chipu a·ning nabajok,
Jong·mema angkilgrimo bilwenwene ba·taibajok,
Chenggari nonoriko okamjawahajok,
Jongd·ol an·chengo bitgipa, ba·ra gital gangnok.

Na·patchi na·butirang chibimaoni katbajok bitchina a·palchi,
Allaringrang beng·blok pil·na a·bachengani,
Ramarango a·dubek ong·katbataiaha,
Jajong aski teng·a grikjangjang nabaaha.

A·bani ge·gimin sam·bolrang bite ong·katbajok,
Ramasamo ru·at gol·genge nabajok,
Matchurang ong·katna a·bachengbataiaha.,
Me·rakurang ku·simang dike nakatbataiaha.

An·sengriri an·chengni moilako chi salpakangaha,
A·dramrang maslengga kongebitchi chi·taiaha,
Guerangni bijako do·chok nok riktaibajok,
Balwa mikka ongropdape ga·akataijok.



14. GANDO MAKKAL

A·chiknan kra kra, bilakgipa wa·sagipasa;
Gando salwene ku·dingana kini simmile dingdingana,
Ka·rak wa·sagipasa, tilta wa·rikeo bichrit kaako,
Do·reng agompa gita dinggrikna chrik watana jimachiko.

Dare riking malgipa, songdu ga·timtingipaba,
Dring sku dingate chasongsku kenatesa,
Unbaksan bil togrike dakgrikao cheakon,
Mingana A·chikkrangde Challang ba Matgrik ukon.

Dongkuode ka·donggipa aro sakgipin matgrik,
Chrikwatatako ra·chakenba ku·atskaatjok.
Matcha salaram gita, toka bijari gita,
Ma·gandako ganama, nogandako chinama, hir hir?

Makkal redingpa·eni makalsa makkal ragne,
Miknagengchi nitatgrike, bilkimchi marie,
Rong·grim bilate, e·cham galatskaaha,
Saengana chiopgenma, attaana stapgenma?

Matgrikna ma·atesa mikkangrang an matcha mikkang
mikkang,
Bil·jak rakchamiting , kni matdram pe·miting,
Do·reng atturi gita, krom garingrangate,
Ganchi de·biljoate chrikwatjok jinmachi nie.

Bilakgipa wa·sagipakosa kilkot de·grikate,
Ruram ro·e salgipa, sireng gisik watgipakosa,
A·song do·reng gakasie ongropao chelchakgipako,
Seokenba ra·angana matgrik ine dillangkan A·chik
a·songko.



15. ANGNI AMBI

Bima bo·olna sijok, bitchi nasi-nabakjok,
O da·nang ang' ambi buchuma!
Bika a·dram be·ari, mikchi chiwaringaijok,
Janggitangna skime re·ataijok, salrangko an·tangna.

Chi basing de·ako, am·bol jabak gatako,
Da·nang ka·oksienggen babilsio me·dik dikra chanako.
Nomil panten' salniko, mesa-an·senge roako,
Da·nang chanchiatenggen kni rama ken·ako.

Gitding bol dotdalgipako nigitoangengjok,
Wa·nok dongdalgipako re·dulangengjok,
Gol·dik su·kangkangari, salko re·ataiaha.
Su·drangna ka·pakari, mikkang bimang sikrepaha.

Be·enchia an·titaka, bimangchia an·mesaka,
Bila jaka sokpajae, nitatari gisiko chanchie,
Dongna nangaijok su·drangko ge·etesa,
Mora ki·sang ma·gapate, gol·dik ge·sa ra·bite.

Kni gisim dingsako, nikna sikon manaha,
Bigil an·gil sikrepan, e·sal gisi gitasa.
Wagam kitman grijok, kan·gkarean gomangjok,
Chame ambi bola gipie, chasong sku napaha.



16. O ANG' ATCHIRAM

Mikrakbaon ang' pringo,
Knaatjok knatoan ku-rangko,
Knaatengachim ang' jumang gitasa,
Indioba mikrakbaode ong-jok agitala.

Knatoriri knatoan ku-ranchi ringringe,
An-saoata do-rang a-songko mikoe,
Pring seng-a, seng-srapkujaon,
Mikoatjok angni chakatsrapkujaon.

A-song-chiga chonbeoba,
Rona dongna dongtojaoba,
An-saoata a-songkode do-o matni ku-rangchi
Knaronga knatoan' ku-rangko a-brin' kosakchi.

Gisiko bikila ninigipa brin' bolgrimrangna,
Ka-srokata, do-o matni ku-rangna,
Ong-genoba chonbegipa chiga agilsako,
Indioba ong-a angna ian an-sengbatani katango.

Gri gipin angna a-gilsako, atchiram song nang-gita,
Nikaia gamchatbate songtangni gamkosa,
Do-o matni dongramana sinti do-pilgima gita,
Mikchi ruene sinti man-a ang' gisikba urang gita.

Ma·marikit nitoe bala, danang burung' sam·bolrang,
 Wachi-a·rak similbaa, uarangni bibalrang.
 Nomil dakmanda rong dingtang dingtang china gita,
 Kraa ma·gape gana da·nang an·tangtang be·enna.

Salni ding·an brapbrap, anggal kamoba,
 Re·o rama jawa dakna kenoba,
 Songdongaigen songtangode jebadak,
 A·rikate bobilko Makkre Kolchipak.



17. DUK!

Dkuk! Duk! ine agantoka pilak mandean,
 Donangjok dukko a·sakna ambi·atchuan.
 Chakbo su·drang na·songba, a·sako chinggitan,
 Re·ataijok salkode, salsa batbat duk mikchin gripdape.

Salgioni toktak ga·akenggipa mikka bichiko niesa,
 Sanapenba tingtotama, ang' mikronni mikchia.
 Janggi tangna a·gilsako, on·gropjok chingo na·asa, O duk!
 Man·jawahama am·beoba, a·sako ang' gisikna suk?

Ama, Apa galchipjokma, ka·saninggija angkoa,
 Mikchi jingjang, sintimana ang' gisiko!
 Pring seng·o, do·krun' kru kru sko choknoka gita,
 Sko songgoke sinti do·pilgima, ang' gisikba ugita.

Balwa boldak pe·gipa, baldape stil minokgipa onjetapjokma?
Ang' mikuriko ang' salakimko saoba den·ahama?
An·ma jrimjrim, sko tingtingsaba ang' an·gilna
Gisik bambamari a·sako ongripgipa duk mikchina.

Dongjaoba ka·sagipa angna ia a·sako,
Dongkuenga saksa on·taigen ang·na Uan sukko.
Bebegipa jaksramgipa, O na·asan ang' janggi tangao,
On·bo Gitel mingsa cholko pangchakna ia a·sako.



18. AMAN' A·KING


Chigitchoa maljorenga, O angni gisik!
Gitok ran·o ringna ska chiringni chibisik.
Jokbaenga ka·sinjrim dake Dilsing' 'bisik,
Changsa ringo ringna ska, ringangkuna gitik.

Aman' a·king a·bri riting,
Nina nitoa dare Me·kamkit chiring,
Rting dake apsan joka Chitompani chiring,
Gijang chio nangdimea, Koksibima chiring.

Dongachim a·songni sambao bimung Champengram,
Kentokachim skangode uko re·na·donan,
Agankukan ja·manoba chasongna uako,
Mitelangku krengangku aman' a·jako.

Mingsinga a·bri, donga Makkre a·kol.
Saksan re·na kensikpila, bang·a matcha mapil a·kol.
Immaru a·bri, a·timbore nina nitoriri,
Aiao da·nang, chanchiata gisiko ka·srisri!

Malchapara, Salbari gisepgriko donga a·bri Bansali,
Bajar anti re·baoba dongna man·ja nang·ko nidoagri,
Do·reng bilsokgijachi, anga songreangoba,
Sintiatman·a ang' gisik Gijang, Dilsing chibimao auako.



Published by Mr. Nightjar R. Marak, Malchapara,
West Khasi Hills, Meghalaya, with financial assistance
from Directorate of Arts and Culture, Government of
Meghalaya, Shillong.
